

KANTON SARAJEVO
SKUPŠTINA KANTONA SARAJEVO
KLUB ZASTUPNIKA Demokratske fronte
Marijela Hašimbegović , zastupnica

SKUPŠTINA KANTONA SARAJEVO

n/r Okerić Elvedin,
predsjedavajući

PREDMET: AMANDMANI NA ODLUKU o brisanju Javne ustanove Zavod za sportsku medicinu Kantona Sarajevo i Javne ustanove Kantona Sarajevo Zavod za zdravstvenu zaštitu studenata Univerziteta u Sarajevu i pripajanju jednom pravnom licu Javnoj ustanovi Zavod za medicinu rada i sporta Kantona Sarajevo

Poštovani,

Na osnovu člana 151. i 152. Poslovnika Skupštine Kantona Sarajevo („Službene novine Kantona Sarajevo“, br.41/12-Drugi prečišćeni tekst ,15/13 i 47/13) dostavljam Amandman na **ODLUKU o brisanju Javne ustanove Zavod za sportsku medicinu Kantona Sarajevo i Javne ustanove Kantona Sarajevo Zavod za zdravstvenu zaštitu studenata Univerziteta u Sarajevu i pripajanju jednom pravnom licu Javnoj ustanovi Zavod za medicinu rada i sporta Kantona Sarajevo**

AMANDMAN

U Članu 1. (Predmet) stavak (2), u daljem tekstu: Ovom odlukom utvrđuje se provođenje promjene dosadašnjeg naziva Javna ustanova Zavod za medicinu rada Kantona Sarajevo u novi naziv Javna ustanova Zavod za medicinu rada i sporta Kantona Sarajevo, koja predstavlja pravnog sljednika zdravstvenih ustanova koje su predmetom statusne promjene, **potrebno je izvršiti izmjenu naziva novonastalog Zavoda i integrisati Javnu ustanovu Kantona Sarajevo Zavod za zdravstvenu zaštitu studenata Univerziteta u Sarajevu. Sada stavak (2) glasi:**

Ovom odlukom utvrđuje se provođenje promjene dosadašnjeg naziva Javna ustanova Zavod za medicinu rada Kantona Sarajevo i **Javne ustanove Kantona Sarajevo Zavod za zdravstvenu zaštitu studenata Univerziteta u Sarajevu** u novi naziv Javna ustanova Kantona Sarajevo Zavod za medicinu rada, sporta i **zdravstvene zaštite studenata Univerziteta u Sarajevu**, koja predstavlja pravnog sljednika zdravstvenih ustanova koje su predmetom statusne promjene.

Usvajanjem Amandmana potrebno je izvršiti izmjenu naziva Zavoda u ostalim članovima, koji su integralni dio predmetne Odluke.

OBRAZLOŽENJE:

Odluka o integraciji i suštinskom **ukidanjenju JUKS Zavoda za zdravstvenu zaštitu studenata Univerziteta u Sarajevu (UNSA)**, predstavlja nedopustiv regresivan korak u javnom zdravstvu. Ovaj Zavod, sa tradicijom dugom 76 godina, nije tek administrativna jedinica, već **esencijalna, diferencirana i specijalizovana institucija** čija je funkcija sada kritično ugrožena. Postojanje **JUKS Zavoda za zdravstvenu zaštitu studenata Univerziteta u Sarajevu (UNSA)** je rezultat istorijske potrebe za ciljanom zdravstvenom zaštitom studentske populacije.

Ukidanje "zdravstvene zaštite studenata" iz samog naziva i pripajanje drugom zavodu, iako se možda čini kao administrativna mjera uštede, može dovesti do **gubitka fokusa, specijalizacije i pristupačnosti** zdravstvene zaštite za ciljanu, mladu populaciju koja ima specifične zdravstvene potrebe (psihološki pritisci, stres zbog ispita, život u domu, prilagođavanje novoj sredini, itd.) koje zahtijevaju ciljani pristup.

Uklanjanjem "studenata" institucija gubi svoj **jedinstveni identitet** i specifičnu misiju. Postaje samo još jedna jedinica unutar većeg zavoda, što može dovesti do razvodnjavanja fokusa na studentske probleme. Kada postane dio većeg, opšteg zavoda, zdravlje studenata može pasti na listi **prioriteta**, jer će fokus biti na široj populaciji i njenim problemima. Studenti su navikli prepoznavati tu instituciju kao svoju primarnu tačku kontakta za zdravlje. Promjena naziva može stvoriti **konfuziju** i otežati pronalaženje specifične usluge koja im je potrebna.

Ako se Zavod "utopi" u opštu zdravstvenu ustanovu, studenti se mogu osjećati manje sigurno i teže se odlučiti za traženje pomoći, misleći da je to samo "obična" poliklinika. Pripajanje i promjena naziva mogu značiti da će to specijalizovano osoblje biti prebačeno na opšte zadatke, ili da će se gubiti fokus na specifične studentske zdravstvene probleme (npr. poremećaji spavanja, anksioznost, specifične infektivne bolesti u kolektivnom smještaju).

Naziv Zavoda mora nedvosmisleno ukazivati da je institucija primarno posvećena **zdravstvenoj zaštiti studentske populacije**.

Argumentacija o navodnom "nepostojanju potrebe" za specifičnom zaštitom studenata je **intelektualno neodrživa i u direktnoj je suprotnosti sa međunarodnim javnozdravstvenim paradigmatama**.

Studentska populacija (uzrast od 18 do 26 godina), prema definiciji Svjetske zdravstvene organizacije (SZO), predstavlja **vulnerabilnu demografsku grupu** koja se suočava sa jedinstvenim psihosocijalnim i zdravstvenim izazovima (npr. tranzicija, stres, mentalno zdravlje).

Zavod obezbijeduje visoko diferenciranu brigu, uključujući **kardiologiju, neuropsihijatriju, psihologiju i stomatologiju**. Integracija će neizbježno dovesti do disolucije ovih esencijalnih, **specifično ciljanih službi**.

Nametnuta integracija neće dovesti do optimizacije, već do **direktnog preopterećenja primarne zdravstvene zaštite** i degradacije kvaliteta usluge.

Ukidanjem Zavoda, desetine hiljada studenata biće preusmjereno na već opterećene domove zdravlja, gdje će biti primorani da se "miješaju sa svim generacijama", što će rezultirati **neprihvatljivo dugim redovima čekanja** i smanjenim pristupom savremenoj dijagnostici.

Nestaje centralizovani model brige koji omogućava brzo i efikasno rješavanje zdravstvenih problema specifičnih za ovu populaciju i akademsku zajednicu.

Proces donošenja odluke karakteriše **krajnje netransparentan i nedemokratski pristup**. Nedostatak konsultacija sa ključnim akterima devalvira legitimitet ove reforme.

Nisu konsultovani **studenti** – primarni korisnici usluga, **Rektorat UNSA** – krovna akademska institucija, **Agencija za kvalitet u zdravstvu (AKAZ)** – relevantno stručno tijelo za evaluaciju standarda. **Ignorisanje nosilaca akademskog i studentskog života je neprihvatljivo**.

Odluka o pripajanju svojim sadržajem mora jasno definisati namjeru za očuvanjem JUKS Zavod za zdravstvenu zaštitu studenata UNSA kao SPECIJALIZOVANU javnozdravstvenu ustanovu za cjelokupnu akademsku zajednicu (studente i univerzitetsko osoblje).

Mladi su budućnost ovog društva, a njihovo zdravlje je neotuđivi preduslov za tu budućnost. Svaka reforma koja nas vraća unazad, lišavajući nas specijalizovanih prava i usluga mora biti snažno osporavana.

Sarajevo, 11.12.2025 godine

Marijela Hašimbegović, dia
zastupnica